



Departementet for Familie, Ligestilling og Sociale Anliggender
Imaneq 4
Postboks 260
3900 Nuuk

Utoqqalinersiat pillugit Inatsisartut Inatsisaata nr. xx ulloq xx xx 2015-meersup tusarniutigineqarneranut akissut.

Pingaarnertigut utoqqalinersiat pillugit nutaamik inatsisartut inatsisiliassaanni siunertarineqartut ilalerpavut eqqarsaatigalugu pisariillisaanissamik kissaateqarnek.

Immikkoortoq 1-mi aamma 3-mi siunnersuummut oqaaseqaatini naliginnaasuni oqaatigineqarpoq iluarsartuussineq iluatsissappat pisariaqartoq, utoqqalinersiaqalernissamut nammineq aningaasanik ileqqaartarnissap pilerinarsarneqarnissaa. Pisariaqarpoq suliniutinik aallartitsisoqarnissaa tamanut sulinermi pensioninut ileqqaartarnerup imaluunniit pensionisiaqalernissamut nammineq ileqqaartarnerup pinngitsooratik pisalernissaat imaluunniit pilerinarnerulersinnissaat, kikkut tamaasa peqataaleqqullugit aamma sanngiinnerpaat pensionisiassanut akiliisalernissaat, utoqqalinersiaqartitsinermi periuseq naapertuuttoq, inuppalaartoq aamma aningaasatigut atasinnaasoq qularnaarumallugu. Taamaasilluta nalilerparput utoqqalinersianik iluarsartuussiniarluni siunnersuutip immikkoortorta taanna qularnartoq, tunngaviillu paasiuminaatsut, iluarsartuussinermit atatillugu suliniutinut ataqatigiissaarisisoqarsimangimmat, ilanngullugit inatsisissatut siunnersuutit, tunngavinnik pineqartunik qulaarnaarisussaagaluartut. Nalornineq annerulerpoq, eqqarsaatigingaanni tunngavittut pineqarmata siunissami piimaartussat, suliffeqarnermi illuatungeriit isumaqatigiissutissaat ataatsimoortut.

Immikkoortut aappaat eqqarsaatigalugu iliuuseriniakkat ilalerpavut, pingaartinneqarmata isertitatigut paasissutissat nutaanerpaat pigineqartarnissaat utoqqalinersiassat naatsorsorneqalerneranni, tamannami kommunip kissaatigisarpaa pisortat ikiorsiissutaannik suugaluartunilluunniit tunniussisoqassatillugu. Tassunga atatillugu kommunip oqaatigeqqissavaa, pingaaruteqarmat nakkutilliinermut atatillugu, kommunip akileraartarnermut paasissutissanut "alakkarterisarsinnaanissaa".

Titarnertaaq 3-mi pisortanut aningaasarsiornikkut allaffissornikkullu kingunissat pineqarneranni erserpoq, iluarsartuussinerup aallartinneraniit ukiut sisamaanni sipaartoqartalissasoq maannakkut utoqqalinersititseriaatsimut naleqqiullugu. Kommuneqarfik Sermersooq isumaqarpoq tamna eqqorriaaneruvallaartoq, paamaarussinermit kulturimut sunngiussisimaffiunngitsumut inuuneq naallugu ileqqaartarnermut, ileqqaakkat akileraarusersorneqartalernissaat aamma suliffeqarnerup iluani iluarsartuussisoqartalernissaanut, ilapittuutaasussanut utoqqaalinersiallit imminnut pilersornerulernissaannut. Ukiumoortumik utoqqalinersianik naleqqussaasoqartassaaq naleqqussaannermi akit qitiusut allangorsimatillugit, tamannalu kommunip tunngaviusumik ilalersinnaavaa, sipaaruteqarnermik kinguneqartussaangimmat.

Immikkoortoq 6-mi innuttaasunut kingunissat pineqarneranni isumaqartoqarpoq utoqqalinersiat pillugit iluarsartuussineq utoqqalinersialinnut aningaasatigut iluaqusiiumaartoq. Isumaqarpugut taamatut isumaqarnek iluamik tunngavilersorneqarsimanngitsoq. Uppernarsaatissaqarpasinngilaq asulilu oqaasiulluni, oqartoqarmat 2013-mi utoqqalinersiallit 3.723-t akornanni taamaallaat 83-t aningaasatigut ajornerulaartumik atugaqarumaartut, tassani innersuussutigineqarmata sipaaruteqarnerup kinguneranik imminut pilersornerulernerup sunniutai, naak taakku tunngaveqaraluartut qularnartunik. Taamaattumik qinnutigissavarput siunissami utoqqalinersiaqalertartussat akornanni sanngiinnersaasut immikkut isigineqartarnissaat. Tassunga atatillugu Kommuneqarfik Sermersuup siunnersuutigisuppa, aningaasanut atugassanut atasut tapit pigiinnarneqassasut. Tamanna utoqqalinersiallit sanngiinnersaannik qularnaarinertut isigissavarput, kommunalbestyrelsip aalajangersinnaajuassappagu aningaasat tigusassat minnerpaaffissaasa annertussusissaat, utoqqalinersialimmit atugassatut tigueqartartussat, aningaasartuutit aalajangersimasut tamarmik peerneqareeraangata.

Inatsisissamat siunnersuutip § 1-ata imm. 1-ani, 2-ani aamma 3-ani takuneqarsinnaavoq utoqqalinersiaqalernissamat ukiut nikerartinneqarsinnaasut pineqartillugit inuit nungullarsimasut ukit 35-t sinnerlugit assassorlutik imaluunniit eqqarsartaaseq atorlugu sulereernerminni. Siunnersuutigissavarput nalunaarummi tamanna itisiliinnarnagu aamma atuaruminartumik ilitsersuusiorfigineqassasoq, kommunini nalilersuisarnerit assigiinngiiaartaqqunagit.

§ 1 imm. 2 aamma 3-mut oqaaseqaatit, immikkoortoq 1-mi siunnersuutigisupparput, ukioq danskisuuani taaneqartoq allanngortinneqassasoq 1. januar 2015-miit 1. januar 2025-mut.

§ 2-mut aamma § 19-mut oqaaseqaatini siunnersuutigissavarput taaguut Naalakkersuisut tamatigut atorneqassasoq - taaguut Ilaqutariinnermut Naalakkersuisoqarfik, Naalakkersuisoqarfiup taaguutaa akuttunngitsumik allanngortinneqartarmat.

Inatsisissatut siunnersuutip § 12-ata imm. 2-ni oqaatigineqarpoq, utoqqalinersiat ingerlaavartumik naleqqussarneqartassasut aningaasarsiornikkut annertuumik allannguuteqartoqarsimatillugu. Siunnersuutigissavarput *annertuumik allannguutit* atuaruminartumik itisilerneqassasut ilitsersuusiullugit.

Inatsisissatut siunnersuutip § 13-ata imm. 1-ani oqaatigineqarpoq, utoqqalinersiat tunniunneqartarnerat allanngussanngitsoq, utoqqalinersialik utaqqiisaa angerlarsimaffimmi avataani, soorlu paaqqinnittarfinni il.il. najugaqartillugu, tassani pisortat akiliisussaatiillugit aamma utoqqalinersialik pilersuisuutiillugu imaluunniit nammineq ineqarnerminut aningaasartuuteqartillugu. Siunnersuutigissavarput pilersuisussaataanermit piunasaqaatit taaneqartut imaluunniit nammineq inigisamat aningaasartuutit taaneqartut nalunaarummi itisilerneqassasut aamma ilitsersuusiorneqassasut atuaruminartunik.

Inatsisissatut siunnersuutip § 15-ata imm. 1-ni oqaatigineqarpoq, meeqqanut tapi peerneqartassasoq, meeqqanut inuusuttunullu ikiorsiisarneq pillugu Inatsisartut peqqussutaat naapertorlugu angerlarsimaffiup avataanut meeraq inissinneqarsimappat imaluunniit tamakkiisumik meeraq pisortanit pilersorneqalersimappat. Siunnersuutigissavarput meeqqanut tapi peerneqartassanngitsoq angerlarsimaffiup avataanut inissiinermi angajoqqaat akileeqaataasussaatiillugit. Angajoqqaat akileeqaataasussaataanerat atorunnaarneq ajorpoq angajoqqaat pensionisiaqalernerat pissutigiiannarlugu. Tassani pensionisialimmut naapertuutinnngilaq meeqqanut tapi peerneqassappat.

Siunnersuutigissavarput meeqqanut tapip angajoqqaat akiliutaattut atuuttussanngorlugu allamut konteeriisoqartalissasoq.

Inatsisissatut siunnersuutip § 22-ni oqaatigineqarpoq, utoqqalinersiat immaqalu tapit qaammammut siumoortumik tunniunneqartassasut, maannakkutut. Allaffissorneq eqqarsaatigalugu naapertuunnerusaaq tamanna allanngortinneqartuuppat kingumoortumik tunniussisoqartalersillugu. Tatumunnga pissutaatinneqarpoq allannguutit pisullu qaammatip ingerlanerani tunniussassat annertussusaannut sunniuteqartartut, kommunimit iluarsineqartarsinnaanissaat pinngitsoortinniarlugu utertitsiortornermi suliakkersuutit amerlasuut utoqqalinersialimmut oqartussaaffimmullu piffissaajaataangaatsiarsinnaasartut.

Inatsisissatut siunnersuutip § 31-ata imm. 2-ni oqaatigineqarpoq, utoqqalinesiat pillugit inatsisartut peqqussutaata nr. 3-p 7. maj 2007-meersup atorunnaarsinneqarpat aamma utoqqalinersiat pillugit Namminersornerullutik Oqartussat nalunaarutaat nr. 14, 27. juuni 2007-meersoq atorunnaarsinneqassasoq. Siunnersuutigissavarput tamanna aalajangersakkani toqqaannartumik takuneqarsinnaassasoq.

Inatsisissatut siunnersuut akuenerineqasappat qilanaarpugut takussallugu ilitsersuut suliarilluagaq paasiuminartorlu aamma imaqartooq naatsorsuusiornermi assersuutiniq tigussaasunik.

Neriuppugut, inatsit atulersinnagu Namminersorlutik Oqartussat kommunimi immikkoortumi akisussaallutik suliaqartunut inatsit pillugu pikkorissaasinnaajumaartoq.

Inussiarnersumik Inuulluqqusilluta/
Med venlig hilsen

Malene Lyngé
Isumaginninnermut, Suliffeqarnermut,
Inuussutissarsiornermullu Ataatsimiititami
Siulittaasoq.

Grethe H. Nielsen
Pisortaq